



Il mas-chalch da Sent

Publicaziuns officialas. Cumpara seguond bsögn.
2003/2005
no. 19

7554 Sent, 17 mai 2004 /mw

Liber da far romma

A partir da sonda, 15 mai 2004 esa liber da far romma pro seguaints tagls: Vallorcha, Traversina 1. fil (vart dretta) Uina e tuot il rest dal god. **Serrà resta il tagl actual Traversina II.** I das-cha gnir ramassà tuot la legna chi's rechatta amo aint il god. Per plaschair rumir romma, resgüm e fronzlas our da las vias.

Il silvicultur

Congedi e vacanzas dal signur ravarenda Jörg Büchel

Davo set ons lavur eschan nus ravarendas intimats da far ün congedi da trais mais per ans scolar inavant. Cumbinà cullas vacanzas dà quai üna absenza da mai fin avuost. Duonna rav. Eleonore Zumbrunn am rimplazza in cas urgiants. (Tel. 081 860 03 36)
Per plaschair telefonar al president, sar Gisep Stricker, tel. 081 860 31 34, o a la vice-presidenta, duonna Anna Barbla Buchli, tel. 081 864 98 29

Jörg Büchel, rav.

Società da musica Sent

Als 23/24 lügl festagescha nossa Società da musica seis 125avel anniversari. Ün program detaglià da quista festa gnarà publichà plü tard. Intant es ün comitè landervia a far ils preparativs. Per cha la festa gradgia bain, dovraina amo persunas chi füssan prontas da'ns dar üna man voluntariamaing per differentas lavurs. S'annunzchar pro Georg Salomon.
Per pudair metter insembel üna cronica da la società dovressan amo documainta in scrit d'avant l'on 1962 e fotografias plü veglias per copchar.
Plünavant tscherchaina singulas unifuormas veglias chi gnivan portadas dals musicants da Sent, avant l'on 1958 cur chi s'ha cumprà ils custüms. Chi chi'd es in possess da tal material dess far il bain e s'annunzchar pro'l president dal comitè d'organisaziun, Ernest Vital. Natüralmaing cha tuot la roba vain restituida.
Grazcha fich

Società da musica Sent

Plazza da giarsunadi da "commerciant/-a" (Ramosch)

Ils cumüns vessan da spordscher scha pussibel plazzas da giarsunadi. Sün proposta dal inspectorat da cumüns ha il cussagl cumünal decis da princip da spordscher üna plazza da "commerciant/-a" pro l'administraziun cumünala. A man da quista publicaziun laina verer scha'l bsögn es insomma avantman. Persunas interessadas s'annunzchan p. pl. fin als 31 mai 2004 pro l'administraziun cumünala, 7556 Ramosch, ☎ 081 860 10 11.

Cussagl cumünal Ramosch

Vernissascha da fotografias

A partir dals **12 mai fin als 30 lügl 2004** vegnan expostas **illa gallaria dal büro da trafic** fotografias da Nadja Demonti-Ritz.
La vernissascha cun aperitiv ha lö als **12 e 13 gün 2004 da las 15.00 fin a las 18.00.**
Minchün es cordialmaing invidà.

Nadja Demonti-Ritz

Tscherchè occupaziun

Per nossa figlia Ciglia tscherchaina ün'incumbenza adattada a sias pussibilitats Telefon 081 864 08 56.

Annatina ed Armon Nuotclà

Maschinas cun ün aschigl

Tenor la ledscha chantunala sun tuot las maschinas paurilas cun ün aschigl obliadas d'avair ün nommer d'immatriculaziun. Per quellas maschinas esa d'avair ün nommer da velo tenor VVV. Quel nommer po gnir retrat pro la cancellaria cumünala, e sto gnir miss vi da la maschina. Per eventualas dumondas sta il pulizist cumünal a disposiziun.

Chancellaria cumünala

Sent Turissem

La radunanza generala da Sent Turissem ha lö in **gövgia, als 3 gün 2004**, a las **20.30** in chasa cumünala Misoch.

Tractandas:

1. Salüd dal president
2. Elecziun dals scrutinadurs
3. Protocol da la radunanza generala 2003
4. Rapport annual dal president
5. Approvaziun dal quint 2003
6. Rapport dals revisuors, dis-charg suprastanza
7. Elecziuns
8. Augmaint paja dal president e da la suprastanza
9. Orientaziun Regiun Parc Naziunal (Gianna Rauch)
10. Varia e diversas

Propostas ston gnir inoltradas in scrit al büro, almain 7 dis avant la radunanza.

A partir da las **20.00** vain servi als preschaints ün **aperitiv**.

Amiaivelmaing invida

Il comitè

**Rapreschantaziun dal film „Luf“,
dumengia als 30 mai 2004, 20:30 h,**

Chasa Misoch, Sent

La stà passada es gnü realisà ad Aschèra, Tarasp ed a Sent il film **“Luf”**. La squadra da film giuvna muossa quist film a Tarasp (sonda, 29 mai) ed a Sent (dumengia, 30 mai). Cun quistas duos rapreschantaziuns vuol ingrazchar la squadra per la collavuraziun e'l sustegn chi han survgnü da la regiun.

Indicaziuns:

Film lung. Basilea, 2003

Dürada: 70 min.

Format: Mini DV

Lingua: dialect svizzer

Filmà: 2. – 16. avuost 2003 ad Aschèra, Tarasp e Sent

Producziun: Matthias Affolter, Carlos Amstutz, Chasper Bertschinger, Jonas Jäggi,
Daniel Weibel

Riassunt:

Ot sü aint ils gods grischuns sulvadis muossan stizis sül retuorn dal luf. Subit as derasan legendas veglias. Anna, üna biologa giuvna, segua a quista scuttaria illas muntognas. Impè da stizis da luf inscuntra ella il prüm a Silvan, ün hom singular in fùgia, chi's zoppa aint ils gods solitaris. El güda ad Anna a tscherchar ils stizis e guadogna uschea sia fiduzcha. Ella imprometta da nu tradir seis zop. Pacs dis davo rivan ils protecturs da l'ambiant Florian, Julie e Robert. In assenza dad Anna inscuntran quists trais a Silvan intant cha'ls chatschaders sun süls tachs al luf ...